

VENDIM
Nr. 505, datë 13.9.2017

PËR PËRCAKTIMIN E FUSHËS SË PËRGJEGJËSISË SHETETËRORE
TË MINISTRISË SË ARSIMIT, SPORTIT DHE RINISË

Në mbështetje të nenit 100 të Kushtetutës dhe të pikës 2, të nenit 5, të ligjit nr. 90/2012, “Për organizimin dhe funksionimin e administratës shtetërore”, me propozimin e Kryeministrit, Këshilli i Ministrave

VENDOSI:

1. Miratimin e misionit dhe të fushave të përgjegjësisë shtetërore të Ministrisë së Arsimit, Sportit dhe Rinisë, sipas përcaktimeve të këtij vendimi.

2. Ministria e Arsimit, Sportit dhe Rinisë harton dhe zbaton politika që synojnë sigurimin e një sistemi arsimor cilësor, zhvillimin perspektiv të arsimit, respektimin e interesave të individit, të komunitetit e të shoqërisë dhe pajisjen me njohuritë e nevojshme për t’u përballur me kërkesat e ekonomisë së tregut, në përputhje me përparësitë kombëtare dhe evropiane; krijimin, transmetimin, zhvillimin dhe mbrojtjen e dijeve me anë të mësimdhënies, kërkimit shkencor e shërbimeve.

Ministria e Arsimit, Sportit dhe Rinisë harton dhe zbaton politikat për zhvillimin e kërkimit shkencor dhe inovacionit, në mbështetje të politikave të zhvillimit të vendit.

Ministria e Arsimit, Sportit dhe Rinisë harton dhe zbaton politika që synojnë garantimin e pjesëmarrjes të të rinjve në jetën sociale dhe shkollore.

Ministria e Arsimit, Sportit dhe Rinisë harton, programon, zhvillon dhe bashkërendon punën për politikat kombëtare në fushën e sportit, integritetit kulturor, harton politikat mbrojtëse dhe promovuese, si dhe krijon hapësirat e nevojshme për zhvillimin dhe përmirësimin e sportit shqiptar.

3. Ministria e Arsimit, Sportit dhe Rinisë, ushtron veprimtarinë e saj, në përputhje me legjislacionin përkatës, kryesisht, por jo vetëm, në fushat e përgjegjësisë shtetërore, si dhe çdo fushë tjetër përgjegjësie që i ngarkohet me ligj ose akte të Këshillit të Ministrave, si më poshtë vijon:

- a) Arsimi parauniversitar;
- b) Arsimi i lartë;
- c) Çështjet e rinisë;
- ç) Zhvillimi i sportit;
- d) Kërkimi shkencor.

4. Ministria e Arsimit, Sportit dhe Rinisë, përfaqëson dhe mbron interesat e shtetit brenda fushës së përgjegjësisë, sipas pikës 3, të këtij vendimi.

5. Vendimi nr. 843, datë 27.9.2013, i Këshillit të Ministrave, “Për përcaktimin e fushës së përgjegjësisë shtetërore të Ministrisë së Arsimit dhe Sportit”, shfuqizohet.

6. Ngarkohet Ministria e Arsimit, Sportit dhe Rinisë për zbatimin e këtij vendimi.

Ky vendim hyn në fuqi menjëherë dhe botohet në Fletore Zyrtare.

KRYEMINISTRI
Edi Rama